



Legge sul friulano
Tempo di mobilitazione per
centrare un obiettivo storico

APONTAMENT - Gianfranco d'Aronco nus fevele de impuartance dal incuntri sul furlan a Udin

La assise e sune la svearine

CHRISTIAN ROMANINI

A mancjin pocj zornadis, ma la machine organizative e je inviade a brene vierte. Come che o vevin anticipât la setemane passade, martars ai 11 di Setembar aes 17.30 li de Aula Magna de Universitât dal Friûl in plaçâl Kolbe si davuelzarà la Assise des Rapresentancis furlanis inmaneade dal Ateneu furlan, dal Comitât 482, dal Comitât pe autonomie e pal rilanz dal Friûl, dal setemanâl diocesano "La vita cattolica" e des emitents radiofonichis Radio spazio 103 e Radio onde furlane.

Par vè cualchi anticipazion su la iniziative, o vin contatât Gianfranco D'Aronco, president dal Comitât pe autonomie e pal rilanz dal Friûl.

- Cuâl isal il significât di cheste assise?

"Chest apontament al è fondamentâl parcè che, propit ta chestis zornadis, o sin in plene discussion de gnove leç di tutele de lenghe furlane: il 4 di Setembar a son tornâts a tacâ i lavôrs de Comission VI regional che e varà di puartâ in consei il test pe aprovazion definitive de norme".

- Ce si spietaiso su cheste norme?

"O vin buinis sperancis che la leç e vadi indevant e che i furlans a rivaran a vè un test che al tutele in maniere fuarte la lenghe furlane. Ancje il president Illy, che al à vût la cortesia di rispuindi a une mê letare vierte, al à declarât su la stampe il so impegn par garantî chest risultât".

- Coventavie duncje cheste assise?

"Sì, parcè che noaltris no vin voie di stâ a cjalâ in maniere passive ce che a fasin chei altris: o vin volût chest apontament par sensibilizâ la opinion publiche e par dâ poie a chei politics che le pensin come noaltris. Cun di plui a son previodûts intervencis di alt nivel, no dome dai rapresentants des istituzions e dai ents locâi, ma o vin cirût di slargjâ il plui pussibil la partecipazion par dimostrâ che cheste e je une bataie di dut il Friûl e di dutis lis sôs categoriis".

- Cualchi non?

"A fâ i onôrs di cjase al sarâ Furio Hon-sell, il retôr magnific de Universitât dal Friûl, dopo a fevelaran Sergio Cecotti, sindic di Udin; Marzio Strassoldo, president de provincie di Udin; Elio De Anna, president de provincie di Pordenon; Antonio Devetag,

O volin sensibilizâ la opinion publiche e dâ poie ai politics che le pensin come noaltris



assessor ae culture dal Comun di Gurize e Roberto Antonaz, assessor regional ae istru-

zion e ae culture. Ancje Tullio De Mauro, linguist de Universitât "La Sapienza" di Rome, nus mandarà une riflession in mert ae impuartance de tutele de nestre lenghe".

- E il mont economic parteciparai?

"Sigûr e chest al è un aspjet une vore impuartant! Ta chescj dîs o vin contatât Adriano Luci, il gnûf president de Associazion dai Industriai di provincie di Udin. Nus à dât la sô poie, ma, stant che al è

impegnât par un incuntri cjapât in precedence, la Assindustrial e sarâ rapresentade di Cristina Papparotto, la vicepresidente vicjarie che e fasarà ancje un intervent a non de categorie. Al è une vore significatîf che ancje il mont economic e produtîf nus stedi dongje ta cheste ocasion parcè che e je une altre vôs autorevule che si zonte poiant lis nestris posizioni. E po al sarâ l'intervent de Arcidiocesi di Udin; l'intervent di Ferdinando Ceschia a non dai dai sindacâts Cgil, Cisl e Uil; di Roberto Visentin, za senatôr de

Republiche e lis riflessions di chei altris organizadôrs".

- Parcè tantis resistencis su la leç di tutele de lenghe furlane?

"Probabilmentri parcè che un ciert nazionalisim talian, i passe 50 agns di inerzie te aplicazion dal articul 6 de Costituzion (*La Republiche e tutele cun normis di pueste lis minorancis linguisticis, n.d.r.*) e i cuasi 10 agns di cuasi inaplicazion de leç 482/99 a àn creat une situazion che e van ben di governâ cussì. Si son fossilizâts ecuilibrîs che chei che a son contraris ae lenghe furlane no àn voie di modificâ parcè che ta cheste maniere a rivin miôr a tignî sot i furlans".

- Lis elezions regionâls dal 2008 a son dongje: ce domandaiso ai politics?

"Il Comitât pe autonomie e pal rilanz dal Friûl al reste fûr des cuestions de direte partecipazion aes elezions parcè che no sin un partît. Se mi è permetût, ma lu fâs dome a titul personal, o fâs apel a la cussien-ce furlane che si svei che e sarès ore! In ducj chescj agns, e cualchidun al è passe 50 agns che al lavore pe cause furlane, o vin dimostrât che no vin interès di "poltronis": il nestri unic interès al è salvâ il Friûl. Cun chest incuntri o vin voie di tornâ a bati su la necessitât di tutelâ la nestre identitât par no jessi splanâts de globalizazion: no podin permetisi di restâ vitimis de omologazion. Come che e diseve Enrica Cragnolini in-tune sô biele poesie: *salvin il Friûl, no stin a butâsi, furlans, tal stamp che al livele*".

Une batude conclusive nus e da Carlî Pup, puarte vôs dal Comitât 482 e redatôr di Radio Onde Furlane "Di là di tantis cjacaris la cuestion e je semplice: si trate di decidi se il furlan al à di jessi tratât di lenghe normal, o di lenghe di serie B. Il Comitât 482 al crôt che furlan, sloven e todesc a sedin lenghis normals che a rindin speciâl la nestre region. In Regjon, invece, ce disino? A 'nd è conseîrs che a son contraris a cualsisei forme di tutele, a 'nd è altris che a pratindin di difindi la nestre lenghe cun misuris che a son plui bassis di chês za previodudis de leç statâl 482/99 e, par fortune, a 'nd è ancje di chei che a son impegnâts par rivâ a di une leç di politiche linguistiche serie. Nô o volin dâi une man a chescj ultims. O crodin che i furlans no acetaran di passâ di sotans ancje cheste volte e che a savaran rivendicâ i dirits che ur spietin. La manifestazion dai 11 e je la ocasion par fâlû".



Gianfranco D'Aronco